



Protokoll

REPRESENTANTSKAPSMØTE

Søre Sunnmøre Reinhaldsverk IKS

Onsdag 12. november 2025

Kl. 09.00 i Saunesmarka

Desse møte:

- Tine Storøy, Herøy
- Karl-Oskar Sævik, Herøy
- Linn Therese Sævik, Herøy - forfall
- Kathrine Lynge , vara for Børre Oddmunn Haanes Waagan, Herøy
- Knut Erik Engh, Ulstein
- Elisabeth Hoddevik, Ulstein
- Oddvar Gjerde, Ulstein
- Bernt Brandal, Hareid
- Jeanette Teigene, Hareid – forfall, vara Annika Brandal - forfall
- Dag Vaagen, Sande
- Olav Myklebust, vara for Camilla Auflem Vik, Sande

Frå administrasjonen:

Dagleg leiar Andrea Sæverud og økonomisjef Gunn-Karin Røyset

Vedtakssak R9/25

Godkjenning av innkalling og sakliste

Vedtak:

Representantskapet godkjende innkallinga og saklista.

Vedtakssak R10/25

Godkjenning av protokoll

Vedtak:

Representantskapet godkjende protokollen frå møtet som blei halde 22.mai 2025.

Vedtakssak R11/25

Val av to representantar til å skrive under møteprotokollen saman med leiar og dagleg leiar.

Vedtak:

Bernt Brandal og Olav Myklebust blei valde til å signere møteprotokollen.

Vedtakssak R12/25**Budsjett 2026 og gebyrregulativ 2026****Budsjett 2026**

Neste års budsjett er lagt opp etter SSB og Kommunalbanken sine prognoser for prisvekst, lønnsvekst og renter. Samtidig tek budsjettet høgde for den lovpålagde oppgåva å dekke inn underskotet på sjølvkostfondet i løpet av ein femårsperiode.

I gjeldande økonomiplan var det lagt opp til ein gebyrauke på 6% i 2026-budsjettet. Med eigarkommunar som strammar til på dei fleste område, har også SSR gått fleire runder i budsjettprosessen for å leite etter innsparingar. Selskapet legg no fram eit budsjett med ein lågare gebyrauke enn i økonomiplanen, 5% i staden for 6%. Innsparingane skal ikkje gå utover kvalitets- eller tenestenivået til innbyggjarane.

Nivået på den føreslegne gebyrauken vil kunne føre til eit positivt resultat på 2,3 mill på hushaldsdelen. Eit slikt resultat rustar selskapet til ei ansvarleg nedbetaling av sjølvkostfondet, som ved årsskiftet var på minus 4,7 millionar kroner. Årsaka til at føreslått gebyr er litt høgare enn generell kostnadsvekst, handlar altså om at selskapet må oppfylle lovpålagde krav om å betale ned på sjølvkostfondet. Ei kontrollert nedbetaling innanfor økonomiplanperioden er med på å reduserer framtidige renteutgifter og risikoen for store gebyrbyks for innbyggjarane dei komande åra.

Budsjettet legg elles opp til eit positivt resultat på næring på 1 mill før skatt, og eit negativt resultat totalt på slam på ca 70.000, då ein her har fond å gå på.

- 1) Det er innarbeidd ein auke i hushaldsgebyret på 5% i budsjettet for 2026. Det vil seie ein auke i gebyret frå kr. 5.388 i 2025 til kr. 5.658 i 2026. Det utgjør kr. 270 per husstand for eit standardgebyr. Underskotet på sjølvkostfondet må dekkast inn og sjølvkostregelverket seier at eit overskot/underskot skal hentast inn i løpet av ein femårsperiode. Gjeldande økonomiplan har lagt dette prinsippet til grunn.

Kalkylerenta er henta frå Kommunalbanken si prognose pr september 2026, og er lagt inn med 4,61% for 2026. Med dette budsjettforslaget vil det negative sjølvkostfondet bli redusert med 1,2 mill i 2026. Det vil seie ein reduksjon frå 4,2 mill til 3 mill.

For fritidsrenovasjon er det lagt opp til ein gebyrauke på 25%, frå kr. 1.560 til 1.950. Det vil seie 390 kroner per fritidseigedom. Gebyrregulativet legg også opp til ein auke i storhushaldsgebyr i forhold til standardgebyret.

Målet er å justere ei underdekning i dagens prismodell for desse gebyra. Lovkravet om full kjeldesortering for fritidsabonnentane er kostnadsdrivande, og CO2-avgifta gjer restavfallet dyrare enn før. Differansen mellom 140 liter (standard) og 240 liter restavfall (storhushald) vil auke med kr. 126 samanlikna med noverande gebyr. Med eit generelt påslag på fem prosent også her, vil differansen mellom 140 liter og 240 liter vere 666 kroner i året. Differansen inneverande år er på 540 kroner.

Forventa salsgevinst ved sal av ein krokbil, kr. 250.000 ligg i budsjettet og er fordelt mellom hushald og næring ut frå fordelingsprosent på kostnadsføringane på bilen. Det er og budsjettert omsetning og kostnad til to nedgravde løysingar i 2026.

- 2) Ut frå signal frå regjeringa, er det ikkje lagt opp til ein auke i tonnprisen knytt til CO2-avgift for 2026. Øvrig varekostnad er lagt inn med ein generell auke på 3%.
- 3) Lønsauken er budsjettert til 4% for 2026. Det er i tillegg gjort mindre justeringar knytt til enkeltpostar i lønsbudsjettet.
- 4) Det er lagt inn avskrivbare investeringar i budsjettet med 7,3 mill for 2026. Mellom anna er det budsjettert for innkjøp av dunkar til sortering av glas- og metallemballasje og noko til meir digitalisering på anlegget, i tillegg til nødvendig utstyr til drifta.
- 5) Dei indirekte kostnadane er budsjettert med 3% auke i 2026 i forhold til prognosen for 2025. Det er i tillegg lagt inn kostnad for deltaking i Benchmarking i 2026, sensorabonnement for nedgravde løysingar og noko ekstra datakostnad og konsulentonorar i samband med nødvendig oppgradering av dataprogram.
- 6) Lånerenter er budsjettert ut frå gjeldande rentenivå i Kommunalbanken, 4,85 % og 4,75% på grønne lån.

Vedtak:

Representantskapet tilrår framlagt budsjett og gebyrregulativ for 2026 og ber administrasjonen sende over til kommunane for endeleg godkjenning.

Vedtakssak R13/25**Økonomiplan 2026 – 2029****Økonomiplan 2026 – 2029**

Økonomiplanen er ei framskriving av budsjettet for dei komande åra, med innlagde justeringar på dei postane vi har føresetnad for å vite noko om korleis vil utvikle seg.

I den sist vedtekne økonomiplanen, var det lagt opp til ei gebyrutvikling på 6%, 5%, 4% dei komande åra. I den nye økonomiplanen legg vi opp til ei gebyrutvikling på 5%, 1%, 0%, 0%.

Den positive utviklinga i den komande planperioden har tre årsaker:

1. Administrasjonen har etter vedtak frå styret lagt fram eit 2026-budsjett som er strammare enn gjeldande økonomiplan.
2. Selskapet ligg an til å levere eit resultat for 2025 som er ein god del betre enn budsjettet, og vil dermed kunne spe på sjølvkostfondet meir enn venta ved årsskiftet.
3. Ei lovendring 1. juli 2025 om regelverket rundt produsentansvar, vil føre til eit paradigmeskifte rundt korleis kommunale avfallsselskap får kompensert ein del av kostnadane sine knytt til den lovpålagde innsamlinga av hushaldsavfall.

Konsekvensen av punkt tre er enno ikkje tredd i kraft, og selskapet har heller ikkje budsjettet med dei potensielle meirinntektene i 2026. Men i 2027 og 2028 har vi lagt inn desse inntektene som ein del av føresetnadene.

Produsentansvarsendinga, i korte trekk:

Den 1.juli 2025 blei avfallsforskrifta endra. Dette fører til ei ny organisering av produsentansvarsordningane for emballasje.

Produsentansvar er eit miljøpolitisk prinsipp som inneber at produsentar og importørar har ansvar for heile livssyklusen til produkta dei set på marknaden. Det inneber også å

finansiere innsamling, gjenvinning og forsvarleg behandling av produktet når det blir avfall.

Den reviderte avfallsforskrifta inneheld fleire skjerpa krav til produsentansvar for emballasje. No-situasjonen for kommunane er at kostnadene knytt til produsentansvar har blitt skubba over på innbyggjarane gjennom avfallsgebyret, då tidlegare regelverk ikkje har spesifisert like tydeleg kven som skal ta kostnaden. Kommunane eller IKS-a har måtte ta til takke med den kompensasjonen produsentansvarsselskapa har fastsett per tonn innsamla emballasje.

Dei nye reglane slår fast at produsentane skal dekke nødvendige kostnader for innsamling, transport og behandling av avfall knytt til produsentansvar. Dette betyr at kommunale avfallsselskap vidare skal dokumentere kostnadene knytt til innsamling og deretter fakturere produsentansvarsselskapa for innsamlingstenesta dei utfører.

I praksis betyr dette at rekninga blir flytta over frå ein spleis mellom alle innbyggjarar, til at forbrukaren sjølv dekker inn framtidig avfallshandtering i det ein betaler for vara. På denne måten blir rekninga rett plassert frå starten av. Den som forbrukar og produserer mykje avfall må også betale for det, i staden for å skubbe kostnaden over på dei som er meir nøysame.

Per dags dato ser det ut til at dei fleste renovasjonsselskap berre får utbetalt godtgjersle for mellom 10 og 20 prosent av dei reelle kostnadene sine for å samle inn og handtere emballasje. Med andre ord har bransjen ein revolusjon i vente når det kjem til kostnadsdekning, om regelverket skal etterlevast slik Samfunnsbedriftene (tidlegare KS Bedrift) meiner. I praksis kan dette bety lågare, eller i det minste lågare stiging, av renovasjonsgebyr over heile landet.

Samtidig er det mykje usemje blant partane om korleis forskriftsendringa skal tolkast. Kven skal berekne kva innsamling, transport og behandling av emballasjeavfall (plast, papir, glas og metall) kostar, kva modellar skal ein bruke for å rekne ut kostnadene, og korleis sikre at IKS-a får dekt sine reelle kostnader uavhengig om dei held til nær svenskegrensa i indre Østfold eller i ei øyklynge ytst på Sunnmøre?

For SSR sin del, støttar vi oss på Samfunnsbedriftene sine tilrådingar, og ventar på ein varsla rettleiar til regelverket som vil kome frå Miljødirektoratet. Målet er å få landa avtalar som kompenserer for dei reelle kostnadene vi har, til det beste for innbyggjarane si lommebok.

**Dei nummererte kommentarane samsvarer med talmerknadene i vedlegget
Økonomiplan 2026-2029 samla:**

- 1) I økonomiplanen er det innarbeidd ein auke i hushaldsgebyret på 5% i budsjettet for 2026, 1% for 2027 og deretter 0% i 2028 og 2029. Sjølvkostregelverket seier at eit overskot/underskot skal hentast inn i løpet av ein femårsperiode, og økonomiplanen har lagt dette prinsippet til grunn. Planen vil gi eit positivt sjølvkostfond frå 2028.

Satsane for kalkylerenta er henta frå Kommunalbanken si prognose pr september 2026 og går frå 4,61% for 2026 til 4,48% i 2029.

I tillegg er det lagt opp til ein auke i gebyret for fritidsrenovasjon på 25% for 2026, og ein auke i storhushald- i forhold til standardgebyr. Sjå vidare utdjuping i budsjettkommentar 1).

- 2) Ut frå signal frå regjeringa, er det ikkje lagt opp til ein auke i tonnprisen knytt til CO2-avgift for 2026. Samtidig er det varsla ein framtidig auke i avgifta dei komande åra, og det er derfor lagt inn ein venta auke i varekosten på 8% pr år for åra 2027-2029.
- 3) Lønsauken er budsjetttert til 4% for 2026. For dei neste åra er auken lagt inn med 4% og 3,8%.
- 4) Det er lagt inn avskrivbare investeringar i budsjettet med 7,3 mill for 2026. Vidare framover i økonomiplanperioden er det lagt inn investeringar på 2,5 mill og 2 mill per år. Avskrivning for nye investeringar samt ferdig avskrivne eigedelar er tekne med i avskrivingskostnaden i økonomiplanen.
- 5) Dei indirekte kostnadane er budsjetttert med 3% auke pr år i økonomiplanperioden. I tillegg er det som nemnt i budsjettsaka, lagt inn ekstra kostnad i 2026-budsjettet til benchmarking, sensorabonnement for nedgravde løysingar og noko ekstra datakostnad og konsulenthonorar i samband med nødvendig oppgradering av dataprogram.
- 6) Lånerenter er budsjetttert ut frå gjeldande rentenivå i Kommunalbanken, 4,85% og 4,75% på grønne lån for 2026. Det er innarbeidd ein reduksjon i forventa rentenivå dei neste åra i økonomiplanen til 4% i 2029.

Her er oversikta over føresetnadene som er lagt til grunn år for år i planperioden:

Forutsetningar	2026	2027	2028	2029
%-vis abonnementsauke	0,5 %	0,5 %	0,5 %	0,5 %
%-vis gebyrauke / - nedgang per år	5,0 %	1,0 %	0,0 %	0,0 %
%-vis kostnadsauke , driftskostnad	3,0 %	3,0 %	3,0 %	3,0 %
%-vis kostnadsauke, varekostnad	3,0 %	8,0 %	8,0 %	8,0 %
%-vis auke lønnskostnad	4,0 %	4,0 %	3,8 %	3,8 %
Rentesats utlånsrente (rentek. bank) gamle lån	4,8 %	4,5 %	4,0 %	4,0 %
Rentesats utlånsrente (rentek. bank) nye lån	4,8 %	4,5 %	4,0 %	4,0 %
Endring antal årsverk				

I føresetnadane er det ikkje tatt med ekstraordinære av- og nedskrivingar og store investeringar.

Vedtak:

Representantskapet godkjende økonomiplanen for 2026 – 2029.

Vedtakssak R14/25

Strategiplan 2026-2029

Målet med strategidokumentet er å sette ein kurs for selskapet i perioden 2026-2029. Ved å definere langsiktige mål og visjonar, vil strategien vere ei rettesnor for kva SSR skal vere og gjere framover.

Strategiplanen avløyser tidlegare strategiplan og er bygd på eigarane sitt mandat og forventningane som ligg i selskapsavtale og eigarstrategien.

Strategien skal vere med å sikre at både dei tilsette, styret, representantskapet, eigarkommunane og innbyggjarane har ei felles forståing av måla som selskapet jobbar for å oppnå.

Vedtak:

Representantskapet godkjende strategiplanen for 2026-2029.

Vedtakssak R15/25

Møtedatoar 2026

Det skal vere to faste møte i representantskapet i 2026, eitt i mai og eitt i starten av november.

Vedtak:

Møtedatoar for representantskapet i 2026 blir:

Onsdag 20.mai kl. 09:00

Onsdag 11.november kl. 09:00

Orienteringssak R16/25

Resultat per august og prognose 2025

Orienteringssak R17/25

Generelle orienteringar ved styreleiar og dagleg leiar

Karl-Oskar Sævik

Leiar i representantskapet

George Fulford

Styreleiar